

## 80 pusat peperiksaan alternatif di Pahang, 63 pusat peperiksaan berisiko terjejas banjir

- Oleh SALEHUDIN MAT RASAD
- 2 Januari 2025, 11:44 am



WAKIL pelajar membaca doa sebelum memasuki dewan bagi memulakan peperiksaan bertulis Sijil Pelajaran Malaysia (SPM) 2024 di Sekolah Menengah Kebangsaan (SMK) Dong di Raub, Pahang. - FOTO/SALEHUDIN MAT RASAD

RAUB: Sebanyak 80 pusat peperiksaan alternatif disediakan di Pahang sebagai persediaan menghadapi kemungkinan banjir yang boleh menjejaskan pusat peperiksaan di seluruh negeri.

Pengarah Pendidikan Pahang, Datuk Amzan Abd. Malek berkata, pusat-pusat peperiksaan alternatif berkenaan disediakan berhampiran kawasan pusat peperiksaan yang berisiko terjejas banjir.

“Pada masa ini, kita mengenalpasti 63 pusat peperiksaan berisiko terjejas banjir dan 40 pusat peperiksaan yang berisiko laluan dinaiki air.

“Jadi apa kita buat ialah kita ada 80 pusat alternatif, maknanya kalau berlaku banjir kita ada pusat alternatif ini,” katanya ketika meninjau perjalanan peperiksaan bertulis Sijil Pelajaran Malaysia (SPM) 2024 di Sekolah Menengah Kebangsaan (SMK) Dong di sini hari ini.

Sebanyak 259 pusat peperiksaan di 229 buah sekolah disediakan di seluruh negeri untuk menempatkan 20,401 calon SPM 2024 Pahang.

Seramai 2,792 petugas dalam kalangan guru dan 396 petugas sukarelawan disediakan bagi melancarkan peperiksaan berkenaan tahun ini.

Menurut Amzan, selain itu pihaknya juga bekerjasama dengan pelbagai agensi berkaitan untuk membawa calon dan petugas sekiranya laluan dinaiki air.

Katanya, selain itu seramai 334 guru bimbingan kaunseling juga bersedia untuk menjalankan tugas sekiranya berlaku musibah khususnya banjir. – **UTUSAN**